

Problem migranata preksutra na sjednici Gradskog vijeća Tuzle



Prema podacima MUP-a TK od početka godine u Tuzli je registrovan dolazak više od 1.200 migranata, a pretpostavlja se da je taj broj mnogo veći s obzirom na saznanja da se mnogi od njih uopće ne prijavljuju u Terenski ured Službe za strance, nego raznim "kanalima" odlaze dalje u potrazi za boljim životom.



Dolaze najčešće preko graničnog prelaza između Srbije i BiH kod Zvornika i Bijeljine, a odatle pješake do Tuzle u nadi da će se što prije domoći zapadne Evrope.

– Radi se o migrantima koji kod sebe nisu imali identifikacione dokumente, a ni potvrde o iskazanoj namjeri dobijanja azila. Svi se upućuju na dalje postupanje Terenskom uredu Službe za strance u Tuzli – saopćeno je iz Službe za odnose s javnošću Uprave policije MUP-a TK.

Najveći priliv migranata bio je u martu i aprilu (ukupno oko 700), dok je u ovom mjesecu broj dostigao cifru od oko 200 migranata.

Prema riječima volontera koji pokušavaju pružiti pomoć migrantima, oni se iz Tuzle upućuju u Sarajevo, odakle žele doći do Bihaća i Kladuše, nastojeći proći dalje do Njemačke, Austrije i drugih zemalja Evropske unije.

Najčešće dolaze iz Pakistana, Sirije, Alžira, Maroka, Bangladeša, Iraka, Afganistana i drugih zemalja Azije i Afrike. Mnogi su oboljeli, svi su iscrpljeni i očajni.

Uslovi u sarajevskom azilu su veoma loši, dok u Tuzli ne postoji punkt za prihvata i boravak migranata.

– Na putu spasa su danima i mjesecima i može se samo pretpostaviti šta sve doživljavaju. Prljavi su, umorni, mnogi su i zaraženi, dosta je žena i djece, a nemaju priliku ni da se čestito okupaju, osim ako imaju novaca pa odu u hotel. Ima ljudi spremnih pomoći, ali i drugih koji bi radije da ne dolaze u Tuzlu, mada je naš grad uglavnom tranzitni centar za migrante. Mi kao da smo zaboravili ratne strahote i vrijeme kada smo vapili za bilo kakvom pomoći iz svijeta, pa smo sada postali neosjetljivi za patnje ovih ljudi. Jedino pomažu Merhamet i Crveni križ, te manji broj već iscrpljenih volontera, ali i mi sami doživljavamo brojne neprijatnosti od sugrađana, zbog toga što pokušavamo tim ljudima pružiti ruku pomoći – kaže za naš portal jedan od volontera koji je želio ostati anonimno.

Smatra da bi i na području grada Tuzla trebalo organizovati neku vrstu kampa za migrante, kako bi im se pomoglo više nego sada, a posebno kako bi im se omogućili higijenski uslovi života za vrijeme boravka na ovom području.

Problem migranata, kako je objavio Klix.ba, bit će raspravljeno na sjednici Gradskog vijeća Tuzla, zakazanoj za 27. juni.

Očekuje se da se vijećnici i Gradska uprava više uključe u rješavanje problema vezanih za sve veći priliv migranata. Među prijedlozima, kako nezvanično saznajemo, jeste i izmještanje Terenskog ureda Službe za strance na lokaciju izvan centra grada. (tl – Foto: RTV7)

Date: 25-06-2019